



6. oktober 2009

Inatsisartut suleriaasianni § 36 imm. 1 naapertorlugu Naalakkersuisunut apequtit imaattut matumuuna saqqummiuppakka:

Naalakkersuisunut apequt:

Erngup nukinganik nukissiuusiornissaq siunertaralugu misissueqqaarnissamik ALCOA-p akuersissummik tunineqarneranut atatillugu Maniitsoq ilanngullugu innaallagissamik pilersorneqarnissaanik ALCOA ilisimatinneqarnikuuaa?

(Inatsisartunut ilaasortaq Karl Lyberth, Siumut)

Tunngavilersuut:

Erngup nukingata innaallagissiornermut atorneqarnera pillugu Inatsisartut inatsisaattut siunnersuummut (UKA 2009/116) tunngatillugu inatsisissamut siunnersuummut nassuiaatini § 9 imm. 1-imut nassuiaatini ilaatigut allaqqavoq: ”Naalakkersuisut pisinnaatitaaffimmik pigisaqartumut pilersuinissamik pisussaaffiliiniarlutik isumaliuteqarsimagunik, Naalakkersuisut misissueqqaarnissamut akuersissummik nalunaaruteqarnerminni tamanna erseqqissaatigereersimasussaavaat.”

Qulaani allassimasoq tunngavigalugu Inatsisartuni 6. oktober 2009 inatsisissatut siunnersuummut atatillugu oqallinnermi Ineqarnermut, Attaveqarnermut Angallannernullu Naalakkersuisoq Jens B. Frederiksen aperigaluarpara ALCOA erngup nukiliornissamik siunertaqarluni misissueqqaarnissamik akuersissummik tunineqarneranut atatillugu Maniitsoq innaallagissamik ilanngullugu pilersorneqartariaqarsinnaaneranik ilisimatinneqarsimanersoq. Uggornaraluartumik Naalakkersuisunut ilaasortamik ilisimatinneqarpunga apeqqutiga akisinnaanagu, tassunga ilisimasani amigarmata.

Tupaallaatiginngitsuunngilara apeqqummut taamatut pingaaruteqartigisumut Naalakkersuisunut ilaasortaq ilisimasaqanngilluinnarmat, taamaammallu kaammattuinera malillugu apeqqut matumuuna § 36 imm. 1 atorlugu ingerlatippara.